



Na osnovu člana 2.9 stav (1) tačka 2. Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16, 41/20, 38/22, 51/22, 67/22 i 24/24), a u vezi s članom 4. stav (1) Zakona o finansiranju političkih stranaka ("Službeni glasnik BiH", br. 95/12 i 41/16), Centralna izborna komisija Bosne i Hercegovine je na 29. sjednici, održanoj 06.05.2026. godine, donijela

U P U T S T V O O DONOŠENJU PROGRAMA UTROŠKA SREDSTAVA POLITIČKE STRANKE

Član 1. (Predmet)

- (1) Uputstvom o donošenju programa utroška sredstava političke stranke (u daljem tekstu: Uputstvo) propisuju se postupak donošenja programa utroška sredstava, koji su političke stranke obavezne dostaviti Centralnoj izbornoj komisiji Bosne i Hercegovine (u daljem tekstu: Centralna izborna komisija BiH), i postupanje političke stranke s utvrđenim programom utroška.
- (2) Program utroška sredstava obuhvata troškove svih aktivnosti političke stranke u kalendarskoj godini, uključujući i troškove izborne kampanje, ukoliko se u toj godini provode izbori za organe vlasti na svim nivoima u Bosni i Hercegovini.

Član 2. (Donošenje programa utroška sredstava)

- (1) Politička stranka dužna je do kraja tekuće godine donijeti program utroška sredstava za narednu kalendarsku godinu.
- (2) Program utroška sredstava mora donijeti nadležni organ političke stranke, u skladu s internim aktom političke stranke, potpisati ovlašteno lice i mora biti ovjeren pečatom političke stranke.
- (3) Program utroška sredstava treba biti sačinjen na način da se osigura potpuna transparentnost planiranog trošenja sredstava.
- (4) Troškovi koje politička stranka ostvari i iskaže u poslovnim knjigama i finansijskom izvještaju moraju biti uporedivi s troškovima koje je politička stranka predvidjela u programu utroška sredstava, tako da se svaka stavka ostvarenih troškova može uporediti s istom stavkom iz programa utroška sredstava.
- (5) Plaćanje obaveza iz ranijeg perioda ne treba biti obuhvaćeno programom utroška sredstava u tekućoj godini, jer su bile planirane i realizirane kao trošak u ranijim godinama, kada je političkoj stranci pružena usluga ili je politička stranka izvršila nabavku materijala.
- (6) Isplate po osnovu zajmova koje politička stranka planira u toku kalendarske godine ne predstavljaju trošak i ne trebaju biti obuhvaćene programom utroška sredstava.
- (7) Planirani interni prijenosi sredstava između organizacionih dijelova političke stranke ne trebaju biti obuhvaćeni programom utroška sredstava.
- (8) Politička stranka ne može planirati troškove za lične potrebe članova stranke, kao i za druge aktivnosti koje nisu u skladu s programom rada i statutom stranke.
- (9) Programom utroška sredstava politička stranka ne može planirati troškove u iznosima koji nisu realni za njene izvore finansiranja i obim poslovanja.

Član 3.
(Sadržaj programa utroška sredstava)

- (1) Program utroška sredstava sadrži sljedeće podatke: naziv političke stranke, broj i datum odluke, podatke o organu političke stranke koji donosi program i osnov za donošenje programa utroška sredstava (statut političke stranke), podatke o planiranim rashodima za finansiranje redovnih aktivnosti po vrstama troška, podatke o planiranim rashodima za izbornu kampanju po vrstama troška i podatke o ukupno planiranim rashodima, kao i potpis ovlaštenog lica i pečat političke stranke.
- (2) Program utroška sredstava sadrži sljedeće podatke:
 - a) Opći podaci: naziv političke stranke, broj i datum donošenja programa utroška sredstava, naziv organa političke stranke koji donosi program i osnov za donošenje programa utroška sredstava;
 - b) Podaci o ukupno planiranim rashodima: ukupno planirani rashodi i iznos, ukupno planirani troškovi za finansiranje redovnih aktivnosti i ukupno planirani troškovi izborne kampanje;
 - c) Struktura planiranih troškova za finansiranje redovnih aktivnosti: vrsta troška, veza s kontima Glavne knjige, iznos planiranog troška i ukupno planirani troškovi;
 - d) Struktura planiranih troškova za izbornu kampanju: vrsta troška (troškovi štampanja plakata i plakatiranja, troškovi oglašavanja u štampanim i elektronskim medijima, troškovi internet-oglašavanja, troškovi zakupa sala za predizbornu kampanju, troškovi organizacije i održavanja predizbornih skupova, troškovi štampanja, umnožavanja i slanja predizbornog materijala biračima i ostali troškovi propagande), veza s kontima Glavne knjige, iznos planiranog troška i ukupno planirani troškovi;
 - e) Obrazloženje donošenja programa utroška sredstava;
 - f) Potpis ovlaštenog lica i pečat političke stranke.

Član 4.
(Dostavljanje programa utroška sredstava Centralnoj izbornoj komisiji BiH)

- (1) Politička stranka podnosi Centralnoj izbornoj komisiji BiH program utroška sredstava u elektronskoj formi putem aplikacije za podnošenje finansijskih izvještaja. Politička stranka program utroška sredstava kreiran iz aplikacije, ovjeren potpisom ovlaštenog lica i pečatom političke stranke Centralnoj izbornoj komisiji BiH dostavlja i u tvrdj kopiji.
- (2) Politička stranka je dužna uz program utroška sredstava Centralnoj izbornoj komisiji BiH dostaviti odluku o usvajanju programa utroška sredstava od strane nadležnog organa političke stranke.
- (3) Politička stranka je obavezna program utroška sredstava za tekuću godinu Centralnoj izbornoj komisiji BiH dostaviti do 31. 03. tekuće godine, zajedno s godišnjim finansijskim izvještajem za prethodnu godinu. Izuzetno, novoosnovana politička stranka Centralnoj izbornoj komisiji BiH program utroška sredstava može dostaviti nakon 31. 03. tekuće godine, ukoliko je registrirana kod nadležnog suda nakon tog perioda.
- (4) Ukoliko politička stranka Centralnoj izbornoj komisiji BiH ne dostavi program utroška sredstava za tekuću godinu, smatrat će se da je troškove ostvarila bez programa utroška.
- (5) Program utroška sredstava politička stranka ne može donijeti krajem poslovne godine, kada su poznati ostvareni troškovi u toj godini.
- (6) Ukoliko politička stranka Centralnoj izbornoj komisiji BiH dostavi program utroška sredstava na kraju poslovne godine, odnosno kada su poznati ostvareni troškovi u toj godini, program utroška sredstava neće biti uziman u obzir.

Član 5.
(Rebalans programa utroška sredstava Centralnoj izbornoj komisiji BiH)

- (1) Politička stranka u tekućoj godini može donijeti rebalans programa utroška sredstava ukoliko za to postoje realne potrebe.

- (2) Rebalans programa utroška sredstava mora donijeti nadležni organ političke stranke, u skladu s internim aktom političke stranke, potpisati ovlašteno lice i mora biti ovjeren pečatom političke stranke.
- (3) Politička stranka obavezna je rebalans programa utroška sredstava dostaviti Centralnoj izbornoj komisiji BiH neposredno nakon što program usvoji nadležni organ političke stranke, a najkasnije do 31. 10. tekuće godine za redovne aktivnosti političke stranke, odnosno najkasnije do 31. 08. tekuće godine za troškove izborne kampanje.
- (4) Politička stranka je obavezna Centralnoj izbornoj komisiji BiH, uz rebalans programa utroška sredstava, dostaviti odluku o njegovom usvajanju od strane nadležnog organa političke stranke, kao i obrazloženje razloga za donošenje rebalansa programa utroška sredstava.
- (5) Ukoliko politička stranka Centralnoj izbornoj komisiji BiH dostavi rebalans programa utroška sredstava na kraju poslovne godine, odnosno kada su poznati ostvareni troškovi u toj godini, rebalans neće biti uziman u obzir. Ostvareni troškovi će biti upoređivani s programom utroška sredstava koji je politička stranka dostavila do 31. 03. tekuće godine.

Član 6.

(Postupanje u skladu s programom utroška sredstava)

Politička stranka finansijska sredstva iz člana 3. stav (1) Zakona o finansiranju političkih stranaka obavezna je koristiti isključivo za ostvarivanje ciljeva utvrđenih svojim programom rada i statutom, a u skladu s usvojenim programom utroška sredstava.

Član 7.

(Prestanak primjene)


Danom stupanja na snagu ovog Uputstva prestaje važiti Uputstvo o donošenju finansijskog plana i programa utroška sredstava političke stranke ("Službeni glasnik BiH", br. 5/22).

Član 8.

(Stupanje na snagu i objavljivanje)

Ovo Uputstvo stupa na snagu danom donošenja, a bit će objavljeno u "Službenom glasniku BiH", "Službenim novinama Federacije BiH", "Službenom glasniku RS", "Službenom glasniku Brčko distrikta BiH" i na internet-stranici Centralne izborne komisije BiH.

Broj: 05-1-02-2-724-1/26
Sarajevo, 06.05.2026. godine



Predsjednik

Jovan Kalaba